

四庫全書

子部

欽定四庫全書

子部

珊瑚網卷三十六

詳校官中書

臣沈鳳輝

編修

臣程嘉謨覆勘

總校官進士

臣

朱

鈐

校對官中書

臣

吳翼成

謄錄監生

臣

丁

榆

欽定四庫全書

珊瑚網卷三十六

明 汪砢玉 撰

名畫題跋十二

憲廟御製

曉晴色染山林紅陣陣寒鴉喜弄風雲歛碧空秋意重

山橫野店畫橋東 成化己巳孟春吉日

中作白地圖
扇週圍以墨

泥金寫詩及年

月用二小璽

圖繪寶鑑云皇明宣廟御筆有山水有人物有花果翎毛草蟲憲廟考廟御筆皆神像及金餅金盤牡丹蘭菊梅竹之類今觀此山水小景瀟灑出塵宛勝國氣韻蓋聖能天縱自各極其妙也臣珂玉謹識

國初朱西邨著色山水

松吹涼生錦籜冠鳥還雲出坐中看勾溪數畝清冷水更著何人並釣竿西村朱朴畫并題時年七十有八

村
古田

翁
家

徐幼文獅子林圖

涼風堂
珍藏

踞地似揚威昂藏渾欲吼猛虎見還猜妖狐寧敢走

右獅子

子

林端歛夕霏泉石閱清景澹然娛人心相看忘日

永

右含
暉峯

空山無宿雲月起當殘夜漸出一峯間分光

到林下

右吐
月峯

不雨自橫空低垂疑飲澗樵子過還驚

神僧度應慣

右小
飛虹

局鐫總忘機魔外自難入虛圓日

夜明一塵元不立

右禪
窩

萬竹雲朝合孤亭月夜明鳳

來緣覽德非為玉簫聲

右竹
谷

夜靜起山深隨風舒片

影漠漠覆紫床獨卧衣裳冷

右卧雲堂

兀立夜迢迢松堂

篆靄銷安心了無法徒受雪齊腰

右立雪堂

蒼蒼庭前栢

明明西來意禪翁指示人又在第二義

右指松軒

雪中疎

蕊開不知閤香發幽人試問時正值黃昏月

右問梅閣

疏

鑿傍雲根虛寒深百尺時汲煮春芽為待參玄客

右汲壺井

非假琢磨功泓澄似鑑同朝來蓮葉盡波動覺秋風

右玉鑑池

余友徐賁幼文洪武間為獅林如海師作此十

二景極為精妙余嘗題其上逮今四十餘年矣今默菴

上人繼獅林之席今年春來京師過余出示此卷觀之
真若隔世事幼文如海皆已謝世余耄獨存不能不興
感於懷也上人復徵余識其後故書此以紀歲月云時
永樂十五年倉龍丁酉春三月望日太子少師吳郡姚
廣孝識

跋獅子林圖咏

此卷獅子林圖徐幼文作凡十二段有題名篆隸寫之
獨損缺其一按圖當是雪堂云各係以五言詩凡十二

首不書名氏詞翰皆簡健後有少師榮公跋尾榮公稱
余友幼文為獅子林如海作十二景極為精妙予嘗題
其上則卷中詩當是榮公手蹟郡志之所宜有也幼文
名貴任至河南左布政工詩能畫吳門四傑其一也獅
子林在蘇城東北隅本元僧維則之道場最號奇勝則
好聚奇石類狻猊故取佛氏語名一石題獅子峰者是
矣或云則得法于本中峯本時住天目之獅子巖蓋以
識授受之源也姑蘇新志維則字天如姓譚氏至正初

人跋尾稱如海師豈即其人歟但榮公跋于永樂丁酉
似為其徒攜至京師而作故有四十餘年之歎而興感
于幼文如海之後世矣嘗聞榮公以少師還吳訪其師
于獅子林至夜漏深微服往後門求見有僧瞑目端坐
止以手捫其頂曰和尚撤下自己事却去管別人事恁
麼榮公憮然而去可謂本教中之喝棒豈即維則歟又
聞榮公法名道衍嘗學于相城之靈應觀道士盡得其
法機事執弟子禮豈遂其所見又應真耶顧風旨巖峻

糠粃事功異學中自有之不必深求其人亦可也暇日
偶閱此卷因重裝之聊紀于此若獅子林之題咏尚多
而幼文亦自有作天如詩尤可誦乃致幾卷以資閒中
一覽 嘉靖癸卯六月望儼山陸深書

徐幼文竹窻風雨

欲暝投僧舍風將雨忽來愁腸與詩思都被竹聲催
東海徐賁畫并題

風雨南禪夜那堪聽竹聲燈前同酒客但有感懷情

啓與幼文晚過南禪寺信上人留宿遙風雨灑玉竹聲
搖夏深感于懷而幼文寫竹賦詩啓不能無言故詩以
識 渤海高啓

人去詩存竹更妍我當吳下想當年清風只在乾坤裏
閒向珠璣掩世賢 宋濂

寫竹題詩贈老禪夜窓聽雨夢金蓮百年留得清風在
三絕令人仰大賢 東吳高季迪徐幼文乃國朝洪武
初名臣于未遇時寓僧舍值風雨夜窓寫竹賦詩曲磬

懷抱到今百有餘年而遺墨如新可愛况學士宋公復為題志可謂三絕也敬書此以見尊重云安城劉宣

化成

林間翰

幼文補快雪時晴圖

欽云東海徐貴為之諸跋已刻六硯齋

趙文敏為子久書快雪時晴四大字幼文補水墨雪景倣郭熙上以硃砂作一日遂覺晴景煥發玉識

姚少師竹卷

永樂六年夏五月余因病不出獨坐于壽椿堂之南窗

忽想長洲舊業之竹歸心油然而生也故作短稍并詩
以紀其事云 翠葉離離拂水雲凌霜勁節不同羣荒
村寥落無人處誰謂茅菴有此君 初八日午前書姚
廣孝

北地風高捲塞雲黃沙吹起雁成羣客邊偶寫龍孫譜
忘却江南有此君 長洲戴冠次少師韻正德辛未季
春上巳日

壽椿堂上玉帶翁忽思故園寫秋風枝枝葉葉妙筆法

湖州老將無能同故園平安有誰報風吹不到長安道
何如手把珊瑚枝歸去江南弄釣絲 沈周

誰寫江南一片雲清風瀟灑不隨羣少師自得空川趣
獨憶虛心抱節君 長洲沈杰次原韻

貌取湘篁入畫圖醉中拈筆墨模糊斑斑寫到關心處
曾有湘妃此淚無 邑人吳一鵬

何處移來半畝雲秋風蕭瑟歎離羣僧家空學元無竹
偶向禪床寫此君 沈濤

百尺喬枝上拂雲東風草木豈同羣我公曾截簫韶管
奏向虞廷答聖君 郡人顧福

維摩示疾隱蒲團閑寫江東翡翠竿想笑故栖歸未得
朔風吹雪滿長安 唐寅

琅玕挺挺拂荒雲林下秋風伴鶴羣鳳輦不知何處去
九疑空望泣湘君 天童懷讓

清午坐深館荒涼憶故廬故廬不可即寒稍竟何如拈
毫寄幽想恍然見扶疎淋漓一枝裏思溢千畝餘誰能

把清玩十襲真璫璵對此後百年風情儼其初斯人起
遺慕夢寐與躊躇楚烟雜湘雨題詩正愁予 義興杭
濟

玉堂學士東坡翁瀟灑墨竹生秋風海內流傳至今惜
異世少師無乃同少師之身本法報法身報身
僧家語也局促强

置青雲道寄心慢作荒山枝高堂烟雨吹如絲 杭淮

和前石田韻

淇園稚子已成翁脩然落紙生清風百歲山門留玉樹

墨痕猶與當年同平安浪說無人報而今野外猶能道
莫遣吳儂歌竹枝愁邊雙鬢易垂絲 漕湖錢貴

看竹無由返故園午窗墨濡灑香痕釣竿漫有滄浪興
恐負天邊雨露恩 沐陽伊乘

烟雨瀟湘隔水雲眼中清趣更無羣少師本是虛心者
獨對清風寫此君 永新胡錦輅

維摩真性在清寒寫出瀟湘碧玉竿欲返故園歸未得
秋風先報客平安 古吳張珍

我朝少師圓頂翁鳳凰池上寫清風油然歸思生筆底
彷彿似與江南同一枝寄贈不望報至今浮落姑蘇道
我來借看摩一枝禪榻茶烟在鬢絲 姚哲

玉帶曾聞侍五雲空門今日有誰羣閒過方丈觀遺墨
灑灑清風似見君 長洲沈源

華景彰卧雲圖

款東湖史為景彰
寫卧雲山居圖

幽人高卧白雲窩聞說分明是華佗嵐氣濕衣山住近
苔痕上榻雨來多身疑太華峯頭宿神向南柯郎裏過

況復傳霖人望久從龍未卜意何如 延陵吳彞

高人愛向山中住野服幽然忘俗慮門連翠巘成比隣
席對長松作賓主石梁苔合少行踪落花滿地局幽戶
萬竿修竹森如束一道寒泉漱寒玉白雲來往本無心
却就君家簷下宿君家有軒堪偃仰夜深雲卧衣裳冷
滿窻雲影夢初回正值山頭明月上榻前雲山中月與
君高興皆清絕從今只合在山中一室閒眠自怡悅

朱昇

幽人構新居卜築山之陽長松翳深澗白雲藹巖房逍
遙卧其下與雲兩相忘白雲本無心卷舒奚有常而以
雲為邊于焉自徜徉披圖慕華躅願言挹清光 梁溪
修學

巖阿有一士考槃遠囂氛衡門鎮長扃門外多白雲頽
然卧其間夢遊湘江濱寒生紛締綌影落羲皇墳無風
自卷舒帶雨常綢緼收之歸肺肝吐出五色文壺心同
盟久一笑忘憂勤醉呼扶遙子稽首雲中君 梁溪王

亨

山雲來往潔如綿多在松扉竹徑邊
雨釀曉寒侵鶴帳月移秋影落琴絃
一官奔走予將老長歲棲遲爾獨賢
便欲操觚遠相訪氤氲惟恐隔前川
梅里呂敏又題白鸞不掃翠蘿深
靜宿簷端伴獨吟寂寂枕書聊遣興
英英出岫信無心長年自悅便清夢
萬里遙瞻識舊林只恐內江歸覲後
也從龍去作甘霖東湖叟

黃山有屋千萬間兵草由來俱瓦礫
梅里有田十萬頃

惟刺家儲書五車教得兒郎成令德大兒學成作官去
為政成都大稱職小兒幹蠱能克家可見而翁有陰隲
尊翁亦作南省郎繡衣駿馬黃金勒唯能翻笑躍紈綺
隱居別業梁溪側怡然自號卧雲叟大榜高書在幽室
雲出似乎其宦遊雲歸似乎其屏迹夫雲出入本無心
人亦如雲皆幻質微茫起乎膚寸間倏忽變化皆充溢
乃知體物存妙理蒸成為菌樂虛出雲飛既動歸復靜
心系虛靈有喧寂翁因卧雲復自號妙理充和更綿密

今日翻翻來泮池索我題詩竟何益六十衰頽老病餘
枯硯殘編已狼籍見善無言豈放情聊為長言一援筆

吳下呂志學

卧雲記

士之處世有篤志于學能明一經取功名如拾芥有隱
居樂善不求聞達視富貴如浮雲由其立志不同故其
立身亦異也勾吳華景彰氏別業于梁溪之東津當其
兵燹中廢為蓬蒿瓦礫所存僅餘數楹尚可為也乃構

草堂于其南剪除荆蕪種花藝竹眼界廓然可遊可憩
因晚年號為卧雲遂以為扁于焉逍遙以終衰朽來求
文以記之予以老拙固辭請之至再勉為之說曰凡山
川之氣聚而為雲雲之為言運也觸石而起憑虛游行
象回轉形也或從龍而行雨或無心而出岫變化萬狀
舒卷莫測非神仙者流豈能卧于其中哉卧之云者偃
休之也昔袁安卧雪以著廉士之名王祥卧冰以全孝
子之行子之卧雲將安為乎非少陵雲卧衣裳冷之詩

乎必也爵祿不及乎心榮辱不聞乎耳高卧一室惟適之安青山在乎目前白雲宿于簷下油然而生始為白衣飄然而升化為蒼狗歟然而散則隨風浩蕩杳莫知其所之焉嗟夫人能知此可謂善達觀矣既知世態如雲知人生如夢何役役為身後計哉然則卧雲之義乃非玩春花延秋月聊寓意于雲耳自前朝至今百年之間岍為陵谷海為桑田者有之惟君家子孫相承基業不墜盖由祖宗積德之隆式克至于今日嘗考之華氏

大族本齊孝子之後高曾以來貲產巨萬至玉溪翁尤
疎財仗義志獨出羣凡交游皆得時縉紳名公故鄉先
生陸子方曾為文以美之事見牆東集觀其文可以知
其人矣若是者豈非積德之報在子孫乎景彰長子約
得過庭之訓出任成都內江簿仲子勤于治生復善幹
蠱庭几燕息雲間睥睨物表優哉游哉藏以待老又安
知蘧蘧然莊周夢蝴蝶乎栩栩然蝴蝶為莊周乎引而
伸之書以為記 洪武己未春正月既望前中憲大夫

順德知府徐績

王孟端湖山書屋圖

卷首有友石遊戲四大玉柱篆為徐霖子仁書

仲鏞與僕有夙昔之好嘗命僕作湖山書屋圖及羈塵
鞅未副其意茲復以佳紙見遺乃促成之因寫是圖以
歸焉吁佳紙佳畫斯為稱矣顧僕拙筆敢與此紙相輝
光哉然仲鏞知我者也必不以是誚并書此以記其歲
月云

鈴縫朱文游戲
翰墨四字印

時永樂庚寅仲秋望日毘陵王

孟端識

友石先生畫品在能之上評者謂作家士氣皆備然其
人品特高能不為藝事所役雖片楮尺縑苟非其人不
可得也此湖山書舍圖聯六紙而成修三十尺畊漁出
沒村舍近遠烟雲變滅種種臻妙非累月構思不可成
豈獨今之所少哉子和藏此真希代之珍 正德丙子
三月既望衡山文徵明題

毘陵王友石此圖文公為第次其品今觀其巖巒杳靄
岬嶸紛披參差出沒于蒼烟白浪之中以至溪橋林屋

疏峰抗館農田漁艇峻父村樵幽踪往復恍若別在世
外真可謂深詣湖山之致者矣讀書于此必能絕冥離
類殊使人遙想而存之談太常思重性好博雅相示此
圖輒遂題其後云 隆慶二年夏六月十有八日俞允
文記

王孟端送行圖

水墨山水
筆條

客裏送君歸故鄉江天秋色正茫茫扁舟一個輕如葉
半是詩囊半藥囊 九龍山王孟端為彥如寫并題

三江五湖口此際水痕收使節詢源委童時記釣游拒
霜紅繞岸擺柳綠連疇畫錦榮殊甚歸承寵渥優高
得暘

我別松江幾度秋渚花汀草不勝愁華船送子松江去
夢落滄浪舊釣游王汝玉

楚天木葉落天容編芳洲長歌一杯酒送上江南舟孤
帆帶斜日一雁飛高秋離情與江水相逐共悠悠王
洪

吳江渺無極蕭條十月初片帆河上發竟去不躊躇由
來君命重非為愛鱸魚 楊士奇

宦游纔賦望江南紫蟹銀魚入夢甘想得到家吟樂處

野橋籬落晚風酣 鶴城楊斌

玉壺
秋水

積水渺無際送君江上還九峯何處數迢遞白雲間舊
業菱花老秋風鷗鷺閒故人能問訊相見一開顏 王

偁

明道
父

吳江秋水濶送君龍江發相期霜降餘來看鳳城月

胡儼

官河水滿正秋霜
鴻鴈南來熟稻梁
此日送君還舊隱

九峯佳處是鱸鄉

姚廣孝

乾坤清氣

汀洲杜蘅歇南浦西風生
美人鼓蘭楫路指江南行
南行南行向何許
東望吳松去吳松秋水多
綠遍芙蓉渚渚外九龍山
山邊三泖灣人家臨水住
日暮采菱還采菱歌易斷
送子愁零亂愁來可奈何
思滿江南岸江南不可
思動子情依依皇都春色
早遲子促來歸李至剛

大宗伯章

碧水芙蓉兩岸開
長卿初自日邊迴
故鄉耆舊遙相接
影向孤村樹裏來
翰林老友王達

秋霜忽已凝
客行歸故鄉
仰瞻鴻雁吸
豈為謀稻粱
丈夫誓許國
冥心浮輕航
矧茲念桑梓
澤灾勢懷襄
白雲迢遞遠
俛首師堅章
解縉

畫船曉發鳳城東
江上青山雲幾重
秋水連天三百里
片帆一夜到吳淞
王景

又送行圖

款云友石
生王爺畫

會際明時得壯游故鄉雖好莫遲留春風一路看花去
山色青青在馬頭 余璿

澤宮春貢選賢能萬里扶搖起大鵬上苑鶯花三日醉
夜窻風雨十年燈雪消官柳黃猶淺水暖溪流綠漸增
自古讀書期報國老夫拭目看飛騰 折肱老人錢仲
益

王孟端山水卷

甲申秋日王紱寫
卷首李西涯篆書

畫竹休將竹史看王猷家自有江山空庭莫訝千尋影

萬里烟波咫尺間
咫尺高下青山遠
近村清江處處繞
柴門鑑湖一曲消
多少須問君王再
乞恩志同少宰得
九龍山人山水長
卷留予家數月不
欲空返為題四篆
字意猶未已復以
二絕終之正德四
年秋八月戊寅

西涯李東陽賓之識

玉峯
深處

細把平生履歷看
直從湘水到吳山
風帆雨屐知無數
都在王郎尺素間
長林疎影照江村
茆屋蕭蕭自掩
門莫笑白頭無舊
業太平何地不君
恩次韵二首後

一首予正德丙寅在陝西夢中得前二句明年丁卯謝
病歸江南續成之涯翁是詩韵偶相類不復別作豈吾
人同志真有所謂神交者耶 石淙楊一清

惟山南
寧居士

待隱
園

人品還從畫裏傳 舊家元識九龍山 他年曾著江行記
忽漫相看尺素間 處處清江曲 枹村白雲碧 石幾柴
門九峯指 點青如許 偏得天家雨露恩 常郡邵寶奉

次

國賢

二泉

將石亭

王孟端水墨小景

在宋箋上

雲山淡含烟疎樹晴延日亭虛寂無人秋光自蕭瑟

九龍山人王紱

友石春溪凝翠圖

前山後山蒼翠隈層層曲曲見樓臺雲隨曉月峯前墮
鷗逐春溪樹裏來兩岸落花人蕩漿半汀殘雨客銜杯
褰區何處有此地物外四時無點埃豈但右軍多筆法
要知黃石是仙才奔灘觸浪飛潏鯉絕壁凝嵐護翠苔

玉室金堂疑太華紫芝瑤艸憶蓬萊相看六月不知暑
一榻清風真快哉 洪武丙子耐軒居士王達題孟端
畫

前山後山蒼翠深大樹小樹寒蕭森不知何處打魚者
日暮泊船溪水陰 鼇叟

王紱自題山水

山插層霄水接雲閉門默坐對爐熏無邊光景無窮趣
月浸梅花夜正分

又畊隱圖

王舍人畫在國初如楊東里方正學之文實先輩典則
自沈啟南文徵仲始一變其法縱橫姿態蓋李何以後
之文也董其昌觀因題

又喬柯竹石

小掛
幅

鳴吉深愛雲林先生之畫常命僕擬之而久未得一日
几間有此紙漫爾為之不覺風度灑然出人意表鳴吉
見之無以優旃為叔敖乎呵呵 永樂己丑立春日王

孟端記

空山昨夜秋琪樹芳華歇石上有叢篁常存歲寒節

孟端為鳴吉寫喬柯竹石索詩故賦如右他日重會于
寒烟古澗濱當撫掌大噓也 汝玉

王孟端竹卷

征衣漠漠帶風沙暫得歸來重可嗟在客每憂難作客
到家誰信却無家解裝羞貫隣翁酒借榻多分野衲茶
堪笑此身淪落久夢中猶自謫天涯 孟敷與僕先後

雲中南歸相去百里間不遑一見乘便寫此竹奉寄并
錄初詩去發一笑也庚辰五月四日王紱

故園歸計似團沙萬事荒荒付一嗟蟻國不須論幻夢
燕巢今已過隣家贈人墨老流離竹借榻詩存感慨茶
百歲此圖三展轉後來得失尚無涯 洪武庚辰王舍
人孟端與孟敷陳先生同涉難北歸間寫此竹及詩以
寄中間曠懷歸況藹然可見遂和其韻以識感慨弘治
甲子距庚辰得一百八年冬至日後學沈周題時年七

十有八

又孟端竹卷

娟娟烟中映夕曛疎疎石上拂晴雲展圖却憶西江夜

獨坐寒窗對此君 五月初九日題于壽椿堂

下有廣孝
白文印

儀軒朱
文印

秋林雨歇輕烟開清姿濯濯無纖埃特立一竿如玉立
猗猗應是淇園來寂寞高齋當日午相對令人轉清楚
彷彿秋聲起座隅依稀碎影生庭戶嫩葉柔梢幾許長

虛心已自含冰霜莫言翠袖天寒薄會見凌雲宿鳳凰
昔年我亦嘗移植愛此青青無改色不似東園桃李花
春風一夜吹狼籍 青城山人題

王孟端墨竹

在宋金箋
上橫幅

孟端寫寄 永年佳友用問平安之意不知骨老近况
何如也

此孟端書
于卷首

虎丘松壁無恙否泉石間諸公登覽

之樂能相憶不無有佳作耶 偶武孟家崑山曾到吳
門相往來否可徵一詩寫于上 舊歲十月僕自北京

歸聞孟敷已仙遊良可嗟也乃嗣能繼志尤為慰情煩

詢之示及

此三段孟端散書竹下有破硯生白文印

鳳池退直寫瑯玕醉墨淋漓尚未乾寄贈故人欣有意
清風日日報平安 義陽偶桓識

龍香細細霜藤滑寫出瀟湘碧玉枝傾耳風簾明月夜
飛瓊何處弄參差 偶桓又識

山館曾移玉數竿色常蒼翠影檀欒別來見說風姿在
不減當年舊歲寒 梁用行書于玉堂之西序

雙勾竹石

小雨春池濕鳳毛天孫深處織蛟綃何人更立湘江水
獨倚薰風憶舜韶 王孟端寫并題

又竹枝

翠影蕭蕭鳳羽齊興狂猶復醉中題何當雪夜扁舟去
載酒相尋造竹西 辛巳三月友石生王紱為竹西先
生寫并題

王孟端虛亭秋色

遠山淡含烟疎樹晴延日亭虛寂無人秋光自蕭瑟
九龍山人

茆齋煮泉圖

小結茅齋四五椽蕭蕭竹樹帶秋烟呼童掃取空階葉
好向山厨煮二泉友石生王紱

江山萬里圖

項子京家藏王孟端江山萬里圖一卷長四丈余嘗見
之真希世之寶也今此卷後雖失主名余以為非孟端

不能作此余家永師書千丈八百本樂此能不憚煩乃
爾此安知非孟端山水之興勃勃不能止奮忘倦之筆
再圖此卷以豁胸中未盡之丘壑也耶不然何筆意相
肖至此汪黃海攜此過余竹中覽畢書此黃海博雅好
古未審以余言為當否 智舷

庚戌秋予以訪友客黃之義水江行往返凡兩月餘凡
曉岫夕巒疎陰空靄波光草色樹影沙痕如迎如醉若
皴若抹偃仰濃淡頃刻異狀令人應接不暇萬斛一葉

張飽帆者破巨浪者或難于上天或駛于過鳥未嘗不
會心豁目詫為大觀呼濁醪獨酌也有紀行雜體詩僅
貌十二三未盡委折為憾一日葦如大師攜示與然所
藏江山萬里圖展閱次覺曩日烟雲變幻峯嶺奇峭估
裝漁艇去來如織光景宛然在對真無聲詩可謂至寶
惜楮尾想有脫落竟失主名偶高谷傳過齋頭出與商
畧谷傳謂非宋元諸家誰克辨此予賞其知言眉公亦
云以蹊徑之奇怪論則畫不如山水以筆墨之精妙論

則山水決不如畫觀是卷益信 當湖洪邦基慶之

宋南宮萬玉莊卷

宋先生克字仲溫長洲南宮里人書學急就章得古人
之妙尤善畫竹此圖雖寸田尺宅而千篁萬玉雨疊烟
森蕭然無塵俗之氣允為世珍也龍惕子識

夏太卿畫竹

仲昭竹二幅一晴一雨晴者曰三徑清風雨者曰林塘
過雨濃疎偃仰各得其宜時姚友叔祥為先君作壽叙

及像贊曰其宋搨黃庭經遺之昶由甲科厯官太常卿
楷書畫竹為當時第一番胡海國兼金購求故有夏卿
一个竹西涼十錠金之謠即一時寶惜可知已 樂卿
氏記于汪岡之萬玉凝青臺

杜用嘉月舟圖

倣荆關體成化四年仲冬十一月鹿冠道士杜瓊寫
月舟上人見疑舫居士于松陵之穆溪戊子秋暮又
見于吳城中居士以其能詩樂與之見出東原先生

月舟圖于袖有不樂與之詩而畧以緇流乎

新住法雲院阿師名月舟去來原不繫身世總成浮印
徹千江水觀空萬頃秋相逢問有漏資斧待誰修行
舟江上月觀我鏡中天皓魄初弦後微波欲定前倦游
收釣具吟穩得詩禪曾到珠涇否三生舊有緣嘉禾

周伯器

名鼎

此夜閒乘月長風謾引舟有僧如惠遠何樹是閻浮飛
鏡三千界推蓬五月秋扣舷能見許予亦事清修

出定何招礙舟行月在天交游千里外樽酒十年前白
社誰非客曹溪即是禪搖搖無住著從此謝塵緣泊
胥門月舟上人以圖索和和中無舟子解事語擊空明
沂流光在人自為之壬辰三月綬誌

一棹清江近塵途更不由烟光分遠渚秋色自中流偶
作有為偈非關無酒憂歸來有別個猶自未迴頭東
原先生贈月舟上人詩畫清絕一時山陰余玠見之遂
和

杜東原自題山水

紛紛畫債未能償
日日揮毫不下堂
郭外有山閒自在
也應憐我為人忙
杜瓊

杜淵孝先生明經博學家貧道尊貞澹醇和粹然為
丘壑之表得朱長文樂圃東偏地結亭聚石號曰東
原故曰郭外有山然云日日揮毫而所存者無幾余
僅有其玄墓看梅圖倣趙善長山水而已 况水畫
中人汪砢玉識

沈貞吉山水題詞

一竿風月一蓑烟雨家傍釣臺西住賣魚生怕近城門
况肯到紅塵深處潮生解纜潮平鼓枻潮落放歌歸
去時人錯認嚴光自是無名漁父 八十三翁沈貞題
于有竹居

沈恒吉山水題詞

此老粗疎一釣徒服也非儒狀也非儒年來只為酒糊
塗朝也村酤暮也村酤胸中文墨半些無名也何圖

利也何圖烟波染就白鬚鬚出也江湖處也江湖時
雨方霽寤寐北窗展玩古法名筆聊為作此贈誠菴老
友一笑 沈恒

沈貞字貞吉弟恒字恒吉號陶菴又號陶然道人為
吳興人即石田先生之父二處士並善丹青壘麓相
映時謂趙文敏同流恒吉之畫師杜徵君余向有婁
江勝感接待寺八景為貞吉所圖一一倣宋元人筆
真合作也 浮溪道脈浩然子識于天綠臺之積石

瑤房

珊瑚網卷三十六

欽定四庫全書

珊瑚網卷三十七

明 汪砢玉 撰

名畫題跋十三

姚侍御春山雲樹圖

春山屏風白雲障扁舟搖搖棹歌唱滄洲老樹縈薜蘿
綠色更比前年多水禽不聞格格鳴茫茫芳草終日晴
村莊路轉蘋花曲如此山川足此生君不見有朋有酒

可游衍無雨無風興非淺不游不衍且不醉虛度年光
自憔悴 嘉興姚綬畫并題

公綬秋溪弄笛圖

尋山資杖藜到處勞步履落手得扁舟前溪秋似洗長
橋卧波如卧龍嶺有篠樹無深松數峰青出白雲杪玉
笛祇今吹曲終曲既終人不見紫毫束絹墨色光日日
畫圖長見面

公綬自題讀書圖

青山白雲繞碧篠蒼烟橫茆茨短簷外時有松風鳴悠
然讀書人琅琅吟吾聲所惜者分陰默契千古情

推蓬梅花圖

昔泊西湖上老梅花正開香從篷底過影自水邊來笑
若巡簷索詩如倚閣裁重看恨官繫夢想獨徘徊

雲東逸史自題諸畫

俱七
言律

仙源久已隔風塵未識山中有避秦人面恐非前度客
桃花只是舊時春入深且自拋漁艇誌路空懷復問津

笑展新圖論往事知誰容易奪天真

右挑源圖

宦途跋涉利途危偏愛江南水竹居萬疊滁山都入畫
一窻周草不教除空濛氣挹胸襟爽清冷光搖几席虛

人世紅塵浮袞袞難從屏障上衣裾

右水竹居

亦是檀欒池上枝却緣殊色借臙脂清陰忽訝繁紅藉
勁節難從染絳移結實定為朱鳳食騰空堪作赤龍騎
多應血淚湘妃盡客賦梁園總未知

題朱竹一作元人

穀庵題松

根梢都不見上下有雲遮願我三千歲山中學服花

筠石圖

老節拂高雲卑枝含宿雨托根湖石畔時有清風起

竹枝

開徑便見竹對人閒賦詩泠泠風觸佩正是雨晴時

瓜蔓

瓜熟蒂自落未落復如何採摘離藤去當無念舊窠
此語可作道眼猶得魚兔而忘筌蹄之意也 弘治紀

元戊申元夕仙癡

姚雲東自題諸畫

俱七言絕

遠山遙望有空青
溪口花橫錦繡屏
住在此鄉無一事

日長閒錄煮茶經

溪山橫錦

楊柳風微水不波
放船載酒樂如何
浮生百歲同春夢

青鏡年來髮易皤

春波載酒

亭如簞笠安溪口
日似銅鉦掛樹頭
但得有山兼有水

古來何處不宜秋

秋亭樹石

松枝挑滿檐頭春石路崎嶇足苦辛薄暮敢投山舍宿

城中多少待炊人

山樵
暮歸

樹木蕭疎雪欲消空江水冷不生潮游魚未出虛垂釣

簑笠迴舟不待招

空江
釣雪

長橋卧波如卧龍晶晶秋水類吳淞此客悠然曳杖去

看盡晚山烟色濃

晚山
煙水

紺園臺殿出樹杪山半斜陽磬幾聲野客乘舟何處去

綠蘋洲上水波平

夕陽
古寺

汲江然竹尋常事欸乃一聲何處歌泛宅浮家無限樂

世途空說有風波

江行
棹歌

一竿坐釣清如許志在蒿閑不在魚借問富春山下路

行人誰厭子陵居

高閑
釣叟

水花浮滿白鷗沙山麓連雲迤邐斜客盪輕舟歸去後

一川風景屬漁家

雲水
漁家

茫茫草澤望中寒未必全輸七里灘此外紅塵深似海

清風獨上釣魚竿

草澤
垂竿

白下追遊記昔年青山如畫樹如烟郭家歌舞楊家酒

一度情思一悵然

為曹竹西寓

閑看脩竹過隣家翠色娟娟亂紫霞掃石坐來忘却去

一坡涼影日西斜

竹西涼影

竹不遮泉松閉壑倚樓日日有餘清雲東逸史雖能寫

難寫風聲與水聲

竹泉松壑

茸茸碧草滿平坡春事相將一半過山鷗飛來人不在

竹窻風雨落花多

竹枝鷗鷺

東風吹竹滿前溪
溪竹叢深路欲迷
日日雨多泥滑滑

不堪鷄鶻再三啼

竹溪啼鳥

山中竹樹總清妍
漱石灘頭寂寂泉
眼底塵埃無着處

天風環佩獨泠然

竹樹流泉

孤巖兀兀長莓蘚
上有竹枝清可人
歷盡歲寒俱挺拔

眼中誰是百年身

巖上竹枝

茂草萋萋生竹根
竹陰分綠到柴門
清樽堪此松花釀

絕勝田家醉瓦盆

柴門竹色

高原獨樹天邊趣怪石幽篁畫裏情莫笑王維成老懶

只從筆底著秋聲

幽篁怪石

巖頭古木纏薜荔下有碧篠相因依向晚秋烟共秋雨

溟光一派入柴扉

古木碧篠

娟娟亂篠翠交加路入山中草映沙一賞頓忘塵土夢

清風吹落紫藤花

公綬在振衣亭作紫藤墨篠丙申十月五日

人家種竹自然佳不對茆堂便對臺最愛一番新雨過

春泥又見笋穿堦

雨後新笋

竹有清風石有苔是誰勾引此中來笑談忽憶梅花老

何處吹簫月滿臺

傲梅
花老

寫竹常煩提健筆柔枝密葉自生風誰知無限蕭森意

不在湘南渭水東

自題
墨竹

逸史畫竹如寫字枝葉皆從八法來苦苦欲求形似者

清風安得掃塵埃

全前

年來為圃菜多嘗夢不思分漢署香堯韭禹糧如可食

何愁不跨五仙羊

自閒居食菜得趣故無漢署分
香之想五仙之羊不跨猶跨

濃黛消香澹兩蛾花陰試步學凌波專房似得傾城色

不怕涼風到扇羅

團扇仕女圖

消受南風一味涼藕絲新織舞裙長臨池試展凌波步

只恐紅蓮妬艷粧

荷花仕女圖

瑤臺無信托青鸞一寸芳心思萬端莫向東風倚修竹

翠衫經得幾多寒

修竹仕女圖

羅襪生香踏軟莎釵橫玉燕鬢鬆鴉春心正是芭蕉葉

羞見宜男並蒂花

軟繡屏風小象妝
細風亭館玉肌涼
含情學寫鴛鴦字
墨洗蕉花露水香

芭蕉仕女
圖二絕

姚公綬老圃秋容

秋深老圃霜初下
秋空自然不俗幻
他風景粧我清閒
雅稱幽人茅屋玉
樹後庭玉簪更綠
歎杞菊與芙蓉歷
陸雁來紅葉葉照
人雙目酒熟興來
最宜野飲喜楓
林春花簇簇不類
三秋分明二月戲
筆寫成一幅莫道
無情此際豈真冷
澹誰解天留晚況
翻憐衰颯盡空悲

宋玉 弘治六年九月雲東逸史畫并調望遠行

姚穀庵蕉池積雪

古蕉池積雪云者海昌勾曲外史張伯雨得漢銅洗後
得白石樹水蕉其上置之洗中因有是名夫蕉所真有
者池則洗為之亦有者積雪則以白石為之似有而實
無者無非真無有非真有故曰有無相形伯雨其真知
道者歟寫圖賦詩伯雨首倡羣公和之僅存劉師魯二
篇以之成卷元社既屋伯雨亦亡流散而去為吳江村

史周氏所得遺什華蓋洞隱者饒介之錄焉其卷今屬
予世姻陶君文式文式博雅好古裝褫愛護又付善畫
者摹寫于冊俾予志本末伯雨師魯之作在卷不錄予
追和伯雨一首乃書之作社中諸老宿之分 弘治元
年十月朔日嘉禾姚綬書

仙人銅洗不復見翰墨淋漓天粟零蕉生池上有新綠
雪滿嶺頭無故青追和清詩聊適興苦求遺卷亦勞形
何如瀹茗澆喉吻帶月分江入大瓶 雲東逸史

好事品題亦小巧古來風韻未凋零仙人掌上團碧
摩詰圖中四序青靜對栽培供坐嘯懶教磨洗是忘形
何當月下仍招我贈子中泠水滿瓶 文式以書來滁
陽索和其所謂蕉池卷者詩成踰年未有以寄之者予
還乃得觀其古卷固不敢題前詩文式強之既不得已
書之卷尾而又書是冊者非區區本意哉 弘治庚戌
春仲呂憲識

長稍羅展翠雲屏曾聽燕山夜雨零何處蕉池綠雪色

也留詩句落丹青筆端造化空裨世眼底風花浪宵形
誰寫西湖清氣味一枝香露浸銅瓶 嶺南林光

門前雪花大如手庭下百草皆凋零陶君何從得此本
芭蕉雪裏仍青青峭拔自存堅白操巖寒不損孤高形
丹青誰是王摩詰便欲輸君玉胆瓶 嘉善周澤

曉起支頤靜倚屏蕉池生意不教零皚皚雪積雲根白
颼颼風翻露葉青我向吟邊偏得趣誰于物外却忘形
一般清味亭臺上絕勝梅花浸玉瓶 新淦蕭子鵬

人間芭蕉葉最大雪花一沾無不零云何池上數片葉
戴雪不減天家青乃知仙翁有幻術山骨偷來玄化形
何當掬取九霄露洗根供上琉璃瓶 王淮

大化洪鑪孰真宰範金削玉紛飄零雙魚傳來漢家洗
孤鳳飛墮仇池青花層六出本無象秀聚三奇真有形
重煩摩詰作詩畫小杓分清歸硯瓶 姚江魏瀚

樹濕雨初過天青雲已收主人尋友去門掩一山秋

一木

嘉善姚御史綬字公綬其父封公頗好善宅西大雲寺
有侍者老矣常受公賑施一日公于田中觀刈獲忽見
此侍者肩襍從宅後直入怪察之則細君就館產子又
詣寺中消息云侍者病三日頃化去矣公心知是其托
生及長而顰黥不若于訓年十六尚未識字其伯仲二
兄咸舉茂才公令季子踐更縣尉怒其狂率杖之歸乃
憤發就師傅日夜程書不休如是十年登進士第為監
察御史請告還家悟前身是大雲寺侍者因自號雲東

逸史具蕉池積雪原卷已載六硯齋筆記矣 汪罔氏識

沈石田乾坤四大景

我所憶兮匡廬泉飛空直下香鑪巔銀河為源彭蠡委
萬古騰沸東南天左深右射五老却塞裳濡足愁攀緣
崖傾石走霹靂闢枯藤怪樹虬龍懸丹青洗出屏風疊
跳珠濺玉聲鏘然誰能置我巖石間仰面落雪水底眠
酒酣戲作五里霧山精嘯雨空中旋嗚呼我歌兮歌始

放九江茫茫日在望

做趙松雪筆

我所憶兮泰山松秦皇避雨駐六龍根如鐵石皮青銅
千秋萬歲枝蒙茸瞳瞳掛日扶桑小隱隱叅天翠黛濃
鸞雛鳳穀不知數和鳴上下如笙鏞潮聲真與東海應
絕頂正見蓬萊峰金膏玉液散入地茯苓芝艸生隆冬
采而食之可不死雲車何日來相從嗚呼我歌兮歌正

長黃河日暮流商商

做李瞻古筆

我所憶兮黃鶴樓瀟湘洞庭生素秋登高挾嵒極萬里

烈風震蕩無時休，九疑連縣似屏嶂。
白日黯慘蒼雲愁，東攀枯木枝龍從。
西望雪嶺寒飈颼，珠簾繡柱九天上。
倒影却射滄江流，仙人坐弄紫玉笛。
往往飛花鸚鵡洲，青蓮居士莫槌碎。
便須縱飲成糟丘，嗚呼我歌兮歌愈
急。鴻鵠冥冥楚天碧。

倣黃鶴
山樵筆

我所憶兮峨嵋雪，六月陰崖凍欲裂。
仙人赤脚翠巖行，鶴氅飄飄玉光潔。
迴飈吹散五谿雲，落絮飛花滿城闕。
滴博蓬婆西海頭，陰風慘澹旌竿折。
萬里雲凝雲不流。

層冰皓皓冬夏結我思仗劍游其巔石棧天梯殊斗絕
六龍迴日不敢過寒光凜冽千丈鐵嗚呼我歌兮歌益

豪太白不動金天高

傲吳仲
圭筆

弘治戊午仲春閒居精舍漫摹古人筆意長洲沈周

石田翁作山水好衍為長卷此其一也翁嘗藏丘壑

妙合造化出之筆端不煩意而自有無窮之趣且四

景摹古人筆法鏘鏘如對前人面目也覽此卷不覺

慨然有所興起 墨池王渙

沈啟南谿巒秋色圖

每憶西禪地城中人不知香爐供課佛茗碗博題詩嗜
淡黃金遠心閒白髮遲勞生堪自薄令我羨吾師子
雖江鄉人歲入郭無虛月然未嘗一假居廛市假必明
公所往來逾三十年明公無煩于子子亦無所憚也今
年夏五月一別迨十月下浣始相見出紙索畫與題以
志契濶因寫谿巒秋色應之寫畢淪籬豆茶為供時夜
已過半矣 庚寅沈周

錦帆涇上千年寺水殿雲廊半不存只有老僧明月下

立當清影夜敲門 陶庵沈貞吉

陶然道人

交游愈久愈情深方外于今數道林清白不移人自老

雙娥峯下月如心 吳興沈恒吉

明公何處好安禪城市山林別有天昨日隣家分與地

便開亭子看雲眠 完庵

廷稿華
美居

月寒山亦白人語磬微謦傳取詩禪去前身我亦僧

池上白蓮花又開情深應不厭頻來白頭却被青山笑

投老相逢得幾回 明師與子有夙契每入城必訪師
師亦不憚予之煩也壬辰秋仲廿又四日午飲山房見
石田詩畫重題以紀一遊云方內陳蒙

枯筆礬山頭氣象磅礴下作竹樹蕭森間小亭跨之
意甚疎秀乃倪黃合併而出者碧苔箋題

沈啟南自題天池亭月圖

天池有此亭萬古有此月一月照天池萬物輝光發不
特為亭來月亦無所私緣有佳主人人月兩相宜還如

庾公樓其興亦不淺把酒醉月華夜夜作沉湎我是好
詩人咏月三百首此亭不厭我將詩侑君酒

石湖書院老樹圖

范公亭東有古樹有身莫可限尺度只憑長六不長長
邊老婪酣遺醜肚一幹朽盡皮肉空一幹輪囷葉麓蔽
盤根到處走虬蛇風雨不驚知得地坐根納蔭且移時
靜玩氣機成感寓人生安得如此頑不死不用常在世
圖石湖書院老樹題 沈周

秋山圖

秋至無所適牛峯期峻攀攜手相魚貫極力凌孱顏東
來望城郭北指鬱江關涼風振木末葉飄中履間俯見
行旅人役役往復還如我二三子逍遙意自閒其中有
達德高誼雲薄天投簪在急流此道今則慳成化丙
申歲八月望奉陪味芝先生游西山牛頭峰謬以詩畫
記其清賞沈周

端居秉高志道與黃綺謀耿耿千歲懷安能一朝酬青

陽肇嘉節義馭逝不留樹木發華滋綠葉揚芳柔上有
鳴春鳥嚶嚶求匹儔踟蹰不能寐攬衣起行遊况復有
良朋分若金石投攜手出西郭眷言山水幽祓除激清
波眺遠陟高丘西北臨廣路巍巍列飛樓誰人為燕會
交親結綢繆光景忽西馳娛樂殊未休豈不念合併欲
邁路阻修顧望勿復道迴身駕輕舟折彼蕙蘭花聊以
忘我憂 味芝以石田畫索子題予許諾踰日詩成書
之乃春眺詩非秋眺詩也不覺失笑若予者真諺所謂

不辨春秋者也 豸史劉昌

巴山圖

吳之為國水所涵有山平行無巉巖我家多水少山處
悵望翠微心所貪時能借墨補不足數紙連絡長菑粘
峯巒重複間溪澗雜樹列布多楓楠或開大壑浸山足
其椒半為浮雲含僧廬隱映遠木杪聽泉採藥我亦堪
嘗聞巴蜀天下險未可一往尋鳬蠶子長之興浩不淺
感此老鬢霜鬢鬢聊因圖此識所見卧遊一生還自甘

存一留余有竹莊數日每談巴山之勝輒為踴躍酒
半出素命筆圖成并為書此沈周

南川高士圖

連峯何窈窕浚谷深且幽中有高識士樂茲逍遙遊長
勤事竹素挹志俟其時叶芙蓉製重襟約以珊瑚鉤
芳古桂林翔聲籍南州鳳鳥不可狎乃在崑崙丘矯首
望光塵遐鄙即無由信思聊致言墨卿慚謬悠惟謙
吳君才德茂優為東崑名流也相別良多歲月懷思不

能置聊以拙畫鄙言通其知也癸巳沈周

鶴聽琴圖

余見王叔明畫鶴聽琴圖喜其命意高古嘗臨摹三四
幀殊自會心昨于友人處見梁楷亦有鶴聽琴圖雪中
洞壑意趣超曠始知古人一樹一石必有所本固非流
俗率意妄誕而無忌憚也歸卧北窻下懷思無已乃想
像援筆觀者幸勿誚其效曠焉時天順癸酉七月念日
也沈周

余昔年得石田畫頗多然旋得旋去如此幅其一也
更有寄竹鶴翁圖瀟洒有致詩亦真率有味書作擘
窠書極雄快竟歸之漢碧云玉水記

倣倪迂山水

為高太
巖所藏

迂翁畫為戲簡到存清臞學者豈易得紛紛墮繁蕪名
家百餘禩所惜繼者無况有冲雅篇數語弁小圖吳人
助清玩重價呼沽諸崔子強我能依樣求葫蘆墨澁不
成運林慚澗與俱何敢惜典型虎賁寔區區醜惡正須

裂捲去莫須臾今夕秋燭下再見眼模糊妄意加潤色
泥塗還附塗崔子詎不見愛及屋上烏 淵甫嘗索此
小景蓋倣倪雲林筆意為之特草草耳今徵題持來燈
下更添數筆雖曰潤色之終不能掩其陋也弘治辛亥
九月前一日長洲沈周

倣吳仲圭筆意

層岑交亂雲厯厯映羣樹雲山互相依青白娟朝暮下
有土著者靜居氣鬱聚修竹蔭高宇細草被紆路幽深

疑世違時復通杖履鳴琴值客來語歇客還去天機發
所樂漠然非人故 吳仲圭得巨然筆意墨法又能軼
出其畦逕爛漫慘澹當時可謂自能名家者蓋心得之
妙非可易學余雖愛而恨不能追其萬一間為此幅生
澁自不足觀猶邯鄲人學步而併失其故矣沈周

又倣梅沙彌山水

秋風吹大澤落籜亦蕭蕭塊坐默無語哀抱還寥寥仰
面睇高天冥鴻不堪招 白石翁

沈石田水墨梅王理之補勾勒竹

平生有眼厭桃李但托梅花是知己小橋初春帶淺水
青鞋布襪從此始看花嚼蕊冰雪中清泱肺肝香沁齒
歸來拈筆弄清真淡墨依稀春繞指花光補之今不作
我欲師之竟誰是橫梢的厯寄疎畧自我意為聊爾耳
正如北人煮床簣笋味茫茫舉其似理之嫌我太草草
斜補竹枝成玉倚要知君子德不孤勿謂畫圖而已矣
崑山士人多畫梅與王理之論其用墨太重殊失清

雅足有累于梅矣因短緜在幀史德徵從容謂曰清雅果何似丈人當示一梢與梅出氣何如遂妄弄此筆理之亦作錯刀數葉間于疎處仍題之以贈德徵弘治甲寅歲端午日沈周

沈啟南自贊畫像

王生見我精神熟照寫今吾瘦于竹問年初及六十人享世渾無半分福一味耽農百不便門前湖水漲低田飢來讀書不當飽靜裏安心惟信天風昂雨壁溪堂破

貧賤生成貧賤過隱服還勞郡守遺私篇或辱尚書和
艸木當衰那復真紙間坐上兩遊塵是非非是都休辨
聊記明時無用人 周自贊

沈啟南送吳文定公行卷并圖

贈君恥無紫玉玦贈君更無黃金篴為君十日畫一山
為君五日畫一水欲持靈秀擬君才坐覺江山為之鄙
峙而不動衍且長惟君之心差可比君初如蒼躋塲屋
復曾如郊失三子方其處逆自有道泰然委命而已矣

時來獻策入明光兩元到手著探囊長裾本不利疾走
三年一鳴驚鳳凰當時聞者皆喜忤意閒心小無矜張
胷中所養已浩大盡付得喪于茫茫訊求細行無不合
似此溥全何可當截瓊作柱豈摘齒用著終須推皇堂
歸來哭親哀毀足鎮日聊生惟菜粥我因羸瘦勸進肉
輒見麻袍淚相續琴和服古當北行鄉人載道羨登瀛
家中買書學教子地下丈人寧不榮文章祇今老更成
浩蕩豈類今之作夜雪淮西躡亂鵝秋風赤壁招孤鶴

其言則古人則今要將根底重詞林隆阡為我表先子
發潛闡幽故誼深緘詩亦為閔螯溺推我曷忘天下心
聲光固是天下士先憂後樂君須任 吳太史原博奔
其先大夫之喪還蘇制甫終告別鄉里以行友生沈周
造此追餞于祖道之末辭鄙曷足為贈太史寧無教我
乎

君不見白石翁墨花破萬紙散落世眼中其間方寸地
貯一太史公是時太史稱吳儂三載磊塊蟠翁胸太史

趨朝天青雀凌春風有淚不作李都尉有賦不擬江文
通直將三寸管五丈素寫出江南千峯與萬峰盡收蜀
錦囊壓倒太史之奚僮絕壁直上高穹窿呼吸似足開
天聰忽復下墜數千尺俯身欲入鼃鼃宮意者徑路絕
乃有雲霞封萬古不盡流洗出玉玲瓏側耳將聽之疑
是縑素間迸作羣靈霍長飈無形百草靡茸列缺崩崖
吐出怪松厯亂羽葆屈蟠虬龍將崩未崩石似舞欲斷
不斷橋飛虹迺有詞家酒人樵青釣童或騎蹇驢或駕

艤舳或躡蠟屐或策短筇高者穿木末若蜚鴻下者蹢
跚勃率如孤蜂兩儀不能主乍闢而乍蒙二曜不定光
倏西而倏東木棧與鳥爭道人擬鵲開窻漸窮至杳
靄但有去路無來蹤猶云紙盡意未盡亂石拳點波洶
洶真宰泣訴神無功太史不能長將向天去流落人間
成楚弓菊亦召主城芙蓉但令居士緬几上秀色欲滴
青濛濛擊節董源隕涕關仝筆底一掃傾宗工沈翁豪
翰何其雄嗚呼隆準之孫豈必隆白石翁生平石交

獨吳文定公而所圖以贈文定行者卷幾五丈許凡三年而始就草樹水石橋道無一筆不是古人而以胸中一派天機發之千奇萬怪種種有真理至于氣韻神彩觸眼若新落墨皴點了絕蹊逕予所閱此老畫多矣無有如此者令黃鶴山樵梅道人見之却走三舍董北苑巨然師當驚而啼曰此子出藍掩吾名矣鑒賞者亦以予為知言否 白石翁畫聖也或曰此卷尤是畫中王也毋論一文進唐伯虎即勝國諸名家疇能及之或又

曰東莊園可以狎主齊盟然是十三幅幅各非一體此卷如萬里長江千山夾之當是翁第一筆瑯琊王世貞

沈石田雪館情話

成化己巳十一月二十有一日適周生辰宿田兄攜殽尊過厚遠來展祝翌旦雪作連有八日之留遂寫雪館情話圖系之詩贈座客泊諸子弟輩因倡而和得若干章為一卷若夫蔡州道清虛堂之雪蘇長公每與子由同處况皆有詩傳世為不磨之稱是知名勝之士然後

可以致此耳今雖人品之殊而事緣之偶亦有雪可賞
兄弟可樂推而論之未必長公不同此心也但蔡州有
語下馬作雪詩滿地鞭箠痕清虛堂云出門自笑無所
詣呼酒持勸惟君家一在途旅一在王定國所似自家
情話之真今周之樂疑有倍于長公者其果有倍乎果
無倍乎彼此一寫也彼此一樂也未始有過不及也迨
其稱與傳者則不無彼此之間矣易曰君子以同而異
此之謂歟詩復借蔡州韻以表仰止非敢強其同云

仲冬廿一日陽已吁枯根我生屆其辰梳髮臨朝暾伯
氏來展祝留我西小軒誓為忘歸草復為忘憂萱燕次
雪作凍日夕呼酒溫開窗看玉樹剪刻千花痕澄懷挹
清冽亦可助丹元坐鄙附熱徒何地容趨奔逍遙有書
卷僵手尚可掀願保歲寒節終老同丘園長洲沈周
鷗波凍合棹難行亭館無如此處清下榻更逢連夜雪
挑燈同話廿年情飛籌送酒忘賓主呵筆題詩羨弟兄
不獨蔡州成勝會亦傳今日是佳盟陳佃

寒雲江郭路沉沉客在蓬門雪正深我欲留人天亦阻
冷須添火酒加斟陶家莫說煎茶事王子難為返棹心
此夜此情何處見溪山如玉照清吟

沈邈

修竹所

翊南

文會何所似苞桑合元根倡和雜長幼不肖慚劉暉時
維仲冬月飛雪滿西軒易氣不害生宜先及勾萱韓休
居首席意誼成春溫摘章動四座彌紙醉墨痕比肩志
六朝下視唐開元得雋成軒渠不及汙且奔千奇出腹
笥豈待故紙掀後之覽斯文將以繼梁園雲鴻沐手

拜書

沈印
雲鴻

清白
傳家

郊居屬歲暮積雪在草根窻虛白于晝積素迎初暎梅
花破清夢蹶起開瓊軒軒階玉成砌潑凍尋初萱熾炭
見故舊滿室如春溫陰氣為消融塵慮無留痕陳蕃過
黃憲得探萬物元酒酣爭劇辨雄如怒馬奔我獨不成
章醉把長髯掀但喜披鶴氅泮真遊西園 陳九韶

琴水
漁夫

白屋
青衫

飄風吹樹杪密雪擁牆根北隴含冬景東窻失曉暎空

厨炊破甑窮巷絕高軒龜手君臣藥憂心兒女萱清茶
童子供濁酒故人溫枯梗瓊瑤蕊茆簷牙爪痕塵難紅
我足山亦白其元地擁岡相槩波凝海不奔棹須留客
繫簾莫倩人掀遙想蔡州道終非獨樂園 沈璞

吾兄仲冬廿一日初度今年值小寒話到深情別非易
酒逢知己量應寬清時喜得同鄉老瑞雪真宜作畫看

莫謂今人偏讓古草廬聯榻兩袁安 沈木

東陽沈
春伯印

寫雪為圖坐雪晨匆匆應笑剡溪人出門措足渾無地

開甕澆寒自有春燈照素麻千嶂出筆呵微凍六花新
天時人事如相約打合清虛好主賓 沈觀大

寒林森聳石坡重複林下多作翠篠緣坡雪屋數椽
二老促膝于其下屋後林背作一亭純用子久畫法
卷端大書雪館情話極類徐季海

沈啟南婁江雪權圖

在紙上卷首
陳瑄篆題

我寫雲中意平林帶遠巒倩誰看玉潤呼酒破風寒因
爾獨歸去令人殊未安山燈今夜榻聊作小盤桓 秉

智為余外甥其誼尤篤十二月二日自東崑來郡中慰
余久客是夕雪作明日伺晴欲行小酌燈下寫婁江雪
權圖系詩送之凡在座者皆連聲和響于後天寒歲晚
殊解寥落沈周

別酒未闌手臨行意萬重江山寫新雪試看丈人峰
諸中

已富三冬學青衫稱少年遠尋東老寓獨羨外甥賢雪
變寒江雨鐘鳴野寺天又驅羸馬去離思遶長川燕

山陸董

鬢絲將滿鏡，恥近覺非年。
四海少兄弟，一杯從聖賢。
索詩煩許子，倚劍在吳天。
歸路薄風雪，扁舟當濟川。
三
日雪不輟，秉智尚阻宿。
承天僧寓是，夕古狂陸君。
自巖天院來，因繼拙惡而有二妙。
秉智請為和，遂和之如右。
周重題

入郭頻相見，余當旅食年。
生涯休說隱，王道正求賢。
噲寄春前酒，寒增雪後天。
便應留信宿，孤棹倚前川。
再用

前韻以答秉老 堇

沈徵君南湖草堂圖

十名人蹟
御李齊裝

楊湖不在北楊湖今在南開門見湖光一鏡空碧涵日
午照黃襖月過陪清酣魚鳥相友于物物無不堪匪特
主人愛客到意亦貪何當夾水誌相與一縱談 沈周
南湖新綠漲平堤閘壓春雲雨過時花片浮紅搖暖影
柳絲垂碧蘸晴漪泥融紫燕營巢急風動金鱗出穴遲
適興行吟知幾度荻溪驚滿錦囊詩 延陵吳寬

結得幽居寄此生
鷗波千頃漾前楹
坐觀雲物日千變
卧聽波濤夜幾更
風起巽離宜夜永
月臨子午正潮平
何當買棹尋真隱
醉倚蓬窗一笛橫
習齋朱旦

雨過南湖漲綠波
湖光皎皎鏡新磨
門遮樛木無塵到
人對薰風結釣蓑
檢齋桑瑜

浪紋鋪錦漫鷗沙
四遶春陰翠柳遮
燕愛輕風頻掠絮
魚吹細雨却飛花
般遊勝賞嘗移棹
美景清歌自浣紗
占斷東吳奇絕處
鑑湖一曲並堪誇
晉昌唐寅

君住楊城北湖在君家南惟愛薰風和更喜宵月涵
有魚供盤餐有酒終日酣出處固難同在我思亦堪高
人偶家此擇勝非所貪欲問湖鄉樂尚欠一宿談沈
芾又次

草堂住湖上門對離方開白鳥銜魚去溪翁放棹來渚
花靜若我水色青于苔雅趣許誰得綠楊垂釣臺楊
恩

潮洄東上一茅堂堂枕晴湖沃土

淮南子南次
州曰沃土

長波濺

珠璣通北海

東漢書孔融文才守北海

景含詩畫帶西莊

唐王給事別業

川

禽

蟹屋之屬見國語

戀戀潛春渚沙鳥嘈嘈還夕陽笑把明窻

塵

仙藥

漫理主翁原是賀知章

海虞桑翹

謙虛麗澤觀于水浩嘆南湖樂可湛出沔入河春潑潑
印箕落斗夜厭厭斯干美室人應美平秩堪明釣亦堪
得景不須窮望外乞完却笑賀狂貪 常熟吳寅

西湖風致人皆仰我獨南湖景可觀花落無聲波影動
鳥飛不動鏡光寒天垂星斗千尋下浪湧銀山萬頃寬

意欲與君分一曲荻蘆深處恣盤桓 桑榮

右南湖草堂詩畫一卷啟南盛年更妙蹟也萬厯癸丑
春獲于相城施氏漫構俚言鑒定之不知其寫贈王原
禹先輩也近讀吳寬桑翹長句始知四十九年之非因
剪却舊跋重裝述贊云石田老仙畫法屢遷草堂圖引
祖述恕先烟雲若斷竹木還連王家之珍於萬斯年是
歲十月朔張丑記

癸未重九日寒山趙子惠攜其家藏名蹟來吾里余

得觀是卷又其母文淑大幅花石殊不凡玉記

石田話別期菊圖

葵南親家遠顧荒落傾倒連日臨別甚覺不忍為圖與
詩少志眷眷且期看菊一致報謁未知葵南能醉我否
弘治庚申九月後一日姻生沈周一見話契濶心親
迹似疎江湖木蘭棹燈火白茆廬夜郭溪先淨秋林露
氣虛名園菊花繞逕造問何如

匡山新霽圖

吳山沈周作匡山新霽圖用巨然筆法水墨固戲事
山川偶流形輟筆信人捲妍醜吾未明摹擬亦云贅所
得在性情今在百尺樓彌筆雲烟生把酒重相對短鬢
秋風生 弘治己丑孟冬八日沈周重題

翁昔少年初畫山蒼松黃竹雜潺湲直疑積雨得深潤
不暇浮雲相往還世外空青秋一色巖前遠黛曉千鬟
天台鶴鹿同人境尚恐翁歸向此間 唐寅

金山寺圖

以下俱石
田自題

常惜忙未到到來方悟閒過江如隔世入寺不知山風
氣薄詩骨夕陽浮醉顏古人誇一宿三宿我方還

山居圖

甲申菊月倣黃鶴山樵山居圖余詩以贈原已先生
秋山骨稜層秋樹枝槎牙尚有餘霜葉點綴如春花緩
步亦足賞何須坐亭車行行日將夕微吟酬物華

江閣看山圖

避俗耽幽僻逃名學古狂深松無六月江閣有餘涼策

杖詩將就看山意自長何須尋絕島此地即仙鄉

碧梧山館圖

東風一夕至吹散麥秋寒花落春愁盡鶯啼午夢殘碧
梧山館靜白葛道衣寬飯後吹新汲雲鐺試月團

幽居秋意圖

焚香淨掃地隱几細開編取足一生內汎觀千古前風
疎黃葉徑露發夕陽天物理終消歇幽居覺自妍

秋窻月色圖

老去不信老自然筋力踈忙緣一頓飯髮病十朝梳掃
地風無力推窻月晒書秋蟲不解靜千聒夜凉初


花沼禽魚圖

野外着秋色因尋靜者居短垣花塞路曲沼鷺窺魚入
坐無塵蹟堆床有道書自忘軒冕累端為世情踈

許由棄瓢圖

一物有一累吾形猶贅然區區此勺器亦合付長川浩
浩天地間吾亦一瓢耳吾哉與瓢哉大觀何彼此

元遺山擲瓢圖云不知黃屋不知堯喧寂何心寄一
瓢我是許由初不爾只將盛酒杖頭挑較石田詩更
進一籌 繡水汪砢玉鑒藏并識



珊瑚網卷三十七